

إِنَّ الدِّينَ عِنْدَ اللَّهِ الْإِسْلَامُ



لَا إِلَهَ إِلَّا اللَّهُ مُحَمَّدٌ رَّسُولُ اللَّهِ

Khutba Jummah

HADHRAT MUHYI-UD-DIN AL-KHALIFATULLAH

Munir Ahmad Azim

21 Septembre 2018
(11 Muharram 1440 AH)

Après ki li fine salué tous so bane disciples (et tous bane Musulmans) entier le monde avec le Salaam - la Salutation de paix dans l'islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor : « **Croyances bane Shia** »

Chaque l'année, pendant le mois Muharram, beaucoup musulmans plore la mort Imam Hussein (ra). Beaucoup kitchoses anti-islamique organisé et pratiqué pendant sa dix premiers jours de Muharram là.

(1) Surtout question *Darga*. Pendant Muharram *Darga* so commerce marcher pli bien. Dimounes bêtement vine jette zot l'argent et perdi zot létemps dans *Darga* et tombe dans plus grand péché (*Shirk*). Zot vine prié devant cinq lédoigts découpé dépi tôle uni et place sa devant zot avec ene la lampe la terre allumé devant zot. Eski musulmans prier la lampe la terre ? Kot zot la foi fine aller ? Amène du sucre, touille coq noir et vine quitte sa dans *Darga*. Tout sa système là péna dans l'islam. Ena dimoune faire promesse pendant Muharram pour donne la toile rouge et vert dans *Darga*, si zot fine réussi dans sa ki zot ti bizin faire.

(2) La question de '*Ghoon*'. Sa kitchose là, péna so place dans l'islam. Li bien défanne pour participe dans sa kitchose-là dans n'importe sous quel forme. Par

exemple, donne l'argent, lève pavillon, batte *Marfa*, risse 'Ghoon' etc., ou donne l'argent kan bane-là passe porte par porte, sa même ki zot dire : 'Ramasse pavillon.'

En faisant sa bane coutume-là, zot fine oublier le vrai but sacrifice Imam Hussein (ra), pour ki faire li fine sacrifier li et so la famille ! Eski Imam Hussein (ra) ti pé la guerre pour gagne pouvoir ? Zamais Imam Hussein (ra) ti assoiffé de pouvoir. Dans le monde islamique azordi, ena l'états kot encore pé réigné par la monarchie (Par l'exemple, l'Arabie Saoudite). Dans certaine de sa bane l'états là, lé roi fanne l'argent pour ferme lizié sa peuple-là lors bane l'injustice, la corruption, la torture etc., ki dérouler dans pays là.

Mais parmi sa peuple là, ena ki soumette mais ena ki lève et expose zot la vie et mort pou combatte sa l'injustice là. Tel est le cas de Imam Hussein (ra). Quoi-ki li ti ene poignée (c'est-à-dire, li et so groupe zot ti bien tigitte) mais li fine levé pour ki le principe de l'Islam li appliqué dans so totalité. C'est pour sa but là Imam Hussein (ra) fine sacrifier li et bane *Ahlé Bait*.

Pour ene musulman, li pas prend sa bane kitchoses là couma dire ordinaire ou sois ki sa ene contentement pour li. Sakaine parmi nous bizin tire leçon dans sacrifice Imam Hussein (ra).

Ou trouve bane musulmans, pé faire grand, grand *Majlis* pé raconte toute sortes kalité z'histoire, pas conner jusqu'à ki point li vrai et après kan *Majlis* fini, ou trouve zot sorti dehors, et zot dire faire chagrin pou écouter. Sa même tout Imam Hussein (ra) so sacrifice ? Gagne chagrin ? Ou bien partage *Malida* (ene préparation gato) ou dilo mort ? Leçon important ki bizin tirer dans la vie de Imam Hussein (ra) séki kan l'injustice ou la corruption ou le mal faire face dans la société, bizin lève la tête pou combattre sa mal là. Qu'importe si ou nombre li tigitte ! Allah avec celui ki combattre pour ki la loi d'Allah établi. Alors ou bizin faire li car Allah avec celui ki lutter pour ki So la loi li établi lors la terre. Imam Hussein (ra) c'est ene l'exemple frappant pour nous.

Li pou ene grand manquement si nous pas faire mention bane Shia kan nous pé traite la vie Imam Hussein (ra). Bane Shia croire ki après la mort du Prophète Muhammad (saws) jusqu'à la fin du monde, Allah fine nomme douze Imams. Selon zot, sa douze Imams là fine être nommé par Allah à travers le Prophète

Muhammad (saws). Premier Imam c'est Ali (ra), deuxième so garçon Imam Hassan, 3^{ème} Imam Hussein et neuf les autres Imams dans sa descendance là même.

Premier Imam (Ali) jusqu'à onzième Imam (Hasan Askari) fine mort pareil couma tous dimounes. Douzième Imam là, garçon Hasan Askari d'après zot, ti fine disparaite mystérieusement dans so jeûne âge et fine cachiette li dans ene la cave. Astaire là jusqu'à la fin du monde, li tout seul ena droit regné lors la terre d'après bane Shia. Croyance dans *Imamat* li *Faraz* pour ene Shia et celui ki pas croire li pour fini par trouve so place dans l'enfer. Dans ene de zot livre *Al-Kafila*, fine faire mention ki si la terre (le monde) reste sans ene Imam, li pou coulé. Toujours selon sa livre là, pareil couma Allah choisir bane prophètes, bane Imams là aussi zot être choisi par Allah.

L'ORIGINE DU SHIA

Shia en li-même li pas ene religion mais c'est ene secte dans l'Islam. Après le martyre de Hazrat Umar (ra) et durant le règne de Hazrat Uthman (ra), l'Islam ti pé propager dans plusieurs pays endehors l'Arabie, telle couma la Perse, etc. Beaucoup dimounes ti pé embrasse l'Islam à sa l'époque là. Mais ena ki ti pé rentrer sincèrement et ena hypocritement. Parmi ti ena ene théologien Juif de Yémen ki ti appelle Abdullah bin Saba. Li fine accepter l'Islam dans le règne de Hazrat Uthman (ra). Mais so l'objectif réel kan li fine embrasse l'Islam c'est pour cause division et désordre à l'intérieur de l'Islam. Li fine vine Madina mais sa pas fine marcher vu ki ti ena beaucoup dimounes intelligent à Madina. Alors li fine alle à Basra et ensuite en Syrie mais là aussi li pas fine capave mette so plan en exécution. Finalement c'est en Égypte ki li fine capave gagne dimounes pour écoute li. Ki li fine faire ? Li fine commence donne grandeur exagéré à Hazrat Ali (ra). Li dire bane dimounes là ki Ali (ra) ki ti bizin nommé après la mort du Prophète (saws). Selon li, dans Torah, fine faire mention ki Ali (ra) ki ti bizin vine successeur du Prophète (saws), mais Abu Bakr (ra), Umar (ra) et Uthman (ra) fine coquin droit Ali (ra).

Secrètement comme ene traître (*Juda*), li fine organise bane mouvements pour soulève contre Hazrat Uthman (ra). Li fine prépare ene l'armée de brigands et vagabonds sous so leadership pour marche dans Madina et sans tardé zot fine assassine Hazrat Uthman (ra). Après Uthman (ra), c'est Hazrat Ali (ra) ki fine être choisi pour vine Calife. Durant le règne de Hazrat Ali (ra), fine ena la bataille de

Jamal et Siffin, kot le groupe de Ibn Saba ti alle dans côté Ali (ra). Ibn Saba profite sa l'occasion là pour mette ene blâme lors Hazrat Ali (ra). Dans l'armée de Ali (ra) même li fine fanne ene fausse notion lors Ali (ra) et plisse, li dire zot ki Jibreel (as) fine faire erreur kan li ti apporte message révélation. Selon Ibn Saba, c'est Ali (ra) ki ti bizin vine prophète, et non pas Muhammad (saws) – *Nawzobillah*.

Alors péna nul doute, c'est Abdullah bin Saba ki fine commence le secte Shia. Quoi-ki bane « *savants* » Shia nié le rôle de Abdullah bin Saba mais sa pas tini kan Saba so nom figure dans ene livre Shia ki appel '*Asma-ur-Rijal*' sous titre '*Riyal-e-Kashishi*' et fine faire mention là-dans selon Imam Jafar Sadiq ki Ibné Saba ti croire dans divinité Ali (ra).

Selon croyance Shia, zot croire dans la venue du douzième Imam. Ki sanlà sa Imam Mahdi là ? Onzième Imam, Imam Hasan Askari fine mort sans zenfant, et sa fine prouvé par so frère Jafar bin Ali et pour zot, pour vine ene Imam, seul garçon ene Imam capave vine ene Imam.

Li ti ene problème kan Imam Hasan Askari ti mort. Li péna garçon. Alors selon bane Shia, 4 ou 5 ans avant la mort Imam Hasan Askari, ene garçon fine prend naissance pour li dépi ene tiffle-esclave et zenfant là fine garde cachiette afin ki personne pas trouve li. Dix jours avant la mort de Hasan Askari, sa zenfant là fine disparaite et li fine amène avec li Quran (so original et complète) écrire par Ali (ra), tous bane livres sacrés tel couma Torah, Zabour, Injeel et ene sac en cuir contenant tous bane miracles de bane prophètes, ainsi ki bâton Moussa (as), chemise Adam (as), bague Suleiman (as) etc. Zenfant là fine cachiette dans ene la cave ki appelle *Surra Man Ra'a*.

Selon bane Shia, sa zenfant là c'est dernier Imam, mais puisque le monde pas capave exister sans ene Imam, sa dernier Imam là pou vivre jusqu'à *Qiyaamat* et li pou reste cachiette jusqu'à ene jour li pour sorti kot li fine cachiette et li pour dirige le monde. Selon ene « *savant* » Shia, Allam Majlisi fine faire mention dans so livre *Haqqul Yaqin* (édition Iranienne) à la page 527 ki kan Imam Mahdi pour vini, li pou détruire tous bane Sunni, li pou commence par zot bane Uléma avant pour détruire bane *Kafir*.

Deux dimounes ki bane Shia pas content du tout c'est Abu Bakr (ra) et Umar (ra). Zot fine donne sa deux califes là toutes sortes de noms, tel couma hypocrite, *Kafir*

et zot maudit sa deux califes là et zot famille. Dans so livre *Kitabur Rauza*, Kalini pé dire ki Imam Baqar fine dire : « *Ki malédiction Allah, bane anges et l'humanité lors sa deux là (Abu Bakr et Umar).* » (Pg. 115) – *Nawzobillah*.

Bane Shia, zot la haine ki zot ena pour calife Hazrat Umar (ra) li tellement grand ki zot fine appelle meurtrier de Umar (ra), Abu Lulu'ah Al-Majoosi comme '*Baba Shujaa-'ud-Dinsa'* (Celui ki brave pour la cause de *Deen*).

Ali bin Mathahir, ene Shia, fine rapporté ki Ahmed bin Ishaq Al-Qummi Al-Ahwas, ene Sheikh de bane Shia, fine dire: « *Jour ki Umar fine assassiné c'est Eid, jour de fierté et l'honneur, jour de la purification et jour de bénédiction et consolation.* »

Mullah Baqar Majlisi, ene l'auteur renommé et ene *Mujtahid* de bane Shia, à sak fois ki li mentionne le nom Umar Farooq dans so bane livres, li ajoute sa « *Alaih-ilanat wal Azaab* » (lor li malédiction et punition Allah). *Nawzobillah*.

Mais bane Shia kan zot nomme le nom de l'assassin de Hazrat Umar (ra), Abu Lulu'ah, zot dire *Rahimullah* (Ki Allah ena pitié pou li). Zot envoie bane grand félicitations lor ene *Zaalim* ki fine touye ene grand compagnon de Hazrat Muhammad (saws) et calife de l'Islam.

Selon bane Shia, Karbala supérieure ki Ka'aba. Dans so livre *Haqqul Yaqin* à la page 360, Allama Baqar Majlisi cite ene narration par Imam Jafar Sadiq, kot là-dans Allah fine ordonne Ka'aba pour reste tranquille et pas déclare li supérieure à Karbala. Selon sa narration là Allah pé décrire bane qualités exceptionnel de Karbala lor Ka'aba. *Nawzobillah*.

CROYANCE BANE SHIA CONCERNANT *MUT'A*

Tout d'abord, laisse mo explique ki veut dire « *Mut'a* ». *Mut'a* c'est kot ene z'homme pour satisfaire so désir sexuelle, alle vers ene madame et propose li (madame là) ene somme l'argent, ou bien du blé, ou tam et défini période ki li pou reste avec madame là, ene jour ou deux d'après l'engagement là. Alors dans *Mut'a*, deux kitchoses ti ena : *Ajal* (définir le temps) et *Ajr* (récompense).

Mut'a c'est ene pratique ki ti exister dans l'époque l'ignorance (*Jahiliya*) par bane Arabes. Pareil couma du vin pas ti arrête ene sel coup, comme sa même la

question de *Mut'a* ti bizin traiter. Sa l'époque là de transition là, dépi *Jahiliya* à l'islam ti bien difficile. Étape par étape, l'islam fine trouve so place parmi sa bane Arabes là. Au début de l'islam, la question de *Mut'a* ti continuer surtout en temps de guerre kot là ene soldat joindre n'importe ki madame, li propose li so *Ajal* et *Ajr* et ensuite li satisfaire so désire sexuelle. Dans sa façon là dans l'islam, *Mut'a* fine prend la forme de mariage temporaire, et plus tard li fine être tout à fait exterminer et condamner par le Saint Prophète Muhammad (saws) après ki l'instruction divine fine vini pou arrête sa pratique là complètement. (Bukhari, Muslim).

Maintenant nous guette bane Shia ki zot dire concernant *Mut'a*. Pour zot sa kitchose là li *Halal* et hautement recommandé pour pratiquer. Selon ene tradition ki zot fine fabriquer ki trouve dans *Manhaj-us-Sadiqin*, le prophète de l'islam (saws) fine dire : « *Celui ki pratique Mut'a ene fois, li pou arrive niveau Imam Hussein, celui ki pratique li deux fois, li pou arrive niveau Imam Hassan, celui ki pratique li trois fois, li pou arrive niveau Ali et celui ki pratique li quatre fois li pou arrive mo niveau (c'est-à-dire, celui du Prophète (saws)).* » Li complètement fausse. Le prophète (saws) zamais fine dire sa.

Allama Majlisi fine cite ene l'autre tradition, ki selon li, le prophète d'Allah fine dire (bien sûr li fausse) : « *Celui ki fine accomplir Mut'a ene fois durant so la vie, li parmi bane habitants du Paradis. Kan ene z'homme assise avec ene femme avec l'intention pour accomplir Mut'a avec li (la femme), ene ange dessane et protège zot jusqu'à la fin de sa. La conversation entre les deux c'est comme-ci pé faire Tasbih. Kan zot attrape la main ene à l'autre, zot péché tombe lors la terre dépi zot les doigts et kan z'homme là embrasse femme là, Allah accorde lors sak embrassé récompense ene Hajj et Umra. Kan zot gagne relation, Allah envoye lors zot récompense grandeur bane montagnes lors sak sensation sexuelle. Kan zot baigné après sa, à condition ki zot croire en Allah et ki Mut'a c'est la pratique du prophète (saws), Allah dire à So bane anges pou guette so deux serviteurs ki fine lever et fine prend ene bain avec croyance ki Li zot Rab et vine témoins ki Li fine pardonne zot, sa deux serviteurs là, tous zot péchés. Pou sak goûte de l'eau ki tomber pendant sa bain là dépi zot cheveux, deux récompenses verser lors zot et dix péchés pardonner et zot rang élever dix fois... Kan sa deux dimounes là fine fini baigner, pour sak goûte de l'eau ki tomber dépi zot les corps, Allah créer ene ange ki faire louanges Allah jusqu'à Dernier jour et tout so récompense arrive dépi sa z'homme et femme ki fine faire Mut'a là. »*

Allama Majlisi cite ene l'autre tradition ki le prophète fine dire (pas conner kot sa li fine alle tire sa) : « *Celui ki faire Mut'a avec ene femme 'croyante' c'est comme quelqu'un ki fine voyager à Ka'aba soixante-dix (70) fois.* » Et dans ene l'autre place, selon Allama Majlisi, le prophète (saws) pé dire : « *Celui ki fine faire sa bon action là beaucoup fois, Allah pou élever so rang. Sa dimoune là pou traverse Pul-Sirat comme z'éclaire. Zot pou être accompagner par 70 rangé anges. Bane ki pou trouve zot pou dimander si pas bane anges sa, près avec Allah ou bane prophètes. Bane anges pour dire zot « Sa c'est bane dimounes ki fine suivre pratique du prophète (en pratiquant Mut'a) et zot pour rentre dans paradis sans rendre compte... ».*

Li bon à faire ressortir ki sa bane traditions là, zot pas vrai. C'est bane fabrications de sa bane « *savants* » Shia là. Péna zot l'origine du tout sa.

Nous tous nous conne l'authenticité de sa deux collection de Hadiths là, Sahih al Bukhari et Sahih Muslim, après le Quran. Mais bane Shia zot, zot rejette sa deux compilation de Hadiths là. Zot pas reconnaite sa deux Imams là, Bukhari et Muslim.

Et pour terminer, li extrêmement grave pou sa quantité fausseté ki bane Shia fine inventé lors le prophète (saws). Bane Hadiths ki fine inventé par zot bane « *savants* » zot totalement fausse. Zamais le prophète d'Allah (saws) pou dire bane insanité coumsa.

Le prophète d'Allah (saws) fine mette en garde celui ki dire bane mensonges concernant li (saws). Hazrat Ali (ra) pé raconter ki le prophète (saws) fine dire : « ***Pas cause menti lors moi parski celui ki cause menti lors moi pour rentre dans difé (l'enfer).*** » (Bukhari).

Salama (ra) pé raconté ki li fine entende le prophète (saws) dire : « ***Celui ki associé avec moi kitchose ki mo pas fine dire, ki li alle cherche so place dans difé (l'enfer).*** » (Bukhari).

Ki Allah aide sakaine parmi nous contre sa bane qualité mensonges et pratiques là et garde nous toujours lors le chemin droit et donne courage pour explique zot le vrai l'enseignement de l'Islam. *Insha-Allah. Ameen.*